



Äntwert vun der Ministesch fir Gläichstellung an Diversitéit Yuriko Backes op d'parlamentaresch Fro n°1664 vum 13. Dezember 2024 vun der honorabeler Madamm Deputéiert Nathalie Morgenthaler.

- **Wéi gesäit den Zäitplang fir d'Aktualiséierung vum „plan d'action national pour l'égalité entre les femmes et les hommes“ aus?**

De Plan d'action national pour l'égalité entre les femmes et les hommes ass amgaang adaptéiert ze ginn. Am Laf vun der Adaptatioun vun dësem Plang sinn eng Rei Consultatiounen vun der Zivilgesellschaft an aner Acteure gemaach ginn. Och am Comité interministériel pour l'égalité entre les femmes et les hommes ass intensiv un dëser Adaptatioun geschafft ginn.

D'Présentatioun vun dësem Plang an der zoustänneger Chamberscommissioun ass fir de Mäerz 2025 geplangt.

- **Wat kënne mir vun deene Länner léieren, déi un der Spëtz vum Index sinn, wéi zum Beispill Schweden?**

De Gender equality index vu Schweden an der Editioun 2024 ass 82, am Verglach ass e 75,4 fir Lëtzebuerg. Ofgebrach an déi eenzel Beräicher ass den Index am Beräich vun der Aarbecht 85 fir Schweden an 80,1 fir Lëtzebuerg, am Beräich vun der Zäit 71,9 fir Schweden an 62,8 fir Lëtzebuerg, am Beräich vun der Muecht 85,8 fir Schweden an 68 fir Lëtzebuerg, am Beräich vum Wësse 76,1 fir Schweden an 69,5 fir Lëtzebuerg an am Beräich vun der Gesondheet 93,8 fir Schweden an 90 fir Lëtzebuerg. Am Beräich vum Geld ass den Index méi héich zu Lëtzebuerg wéi a Schweden.

Schweden huet eng laang Traditioun an der Gläichstellungspolitik. D'Land huet eng progressiv Politik wat d'Work/Life Balance an d'Verriedung vun de Fraen an den Entscheidungsorganer betrëfft. Dës Politik gëtt duerch Gesetzer an lwwerwaachungsmechanismen ënnerstëtzt an mecht sech haaptsächlech duerch gutt Indexwäerter an de Beräicher Aarbecht, Zäit a Muecht bemierkbar. Sou ass d'Flexibilitéit am Berufsliewen eng vun de wichtegen Moosnahmen a Schweden.

Och ass d'Representatioun vun de Fraen an der Politik an op Decisiounsposten héich, wat et erméiglecht inklusiv Politiken emzesetzen, an de Besoine vu jidderengem besser Rechnung ze droen. Waat Care-Aktivitéite betrëfft, sou sinn déi a Schweden méi gläichméisseg op Männer an op Frae verdeelt wéi an der Moyenne an Europa an och zu Lëtzebuerg.



Am Beräich vum Wësse ass den Index méi héich zu Lëtzebuerg waat den Enner-Beräich Leeschtung an Participation betrëfft, wougéint en am Enner-Beräich Segregatioun méi héich an Schweden ass; dest betrëfft déi net gléichméisseg Verdeelung vun Fraen an Männer an verschiddenen Bildungsberäicher wéi Educatioun, Gesondheet an Soziales, Geeschteswëssenschaften an Konscht.

Och wa Lëtzebuerg am Beräich vun der Muecht an de lëschte Joeren vill Fortschrëtter gemaach huet, sou bleift dëst ee vun de Beräicher mam weiderhi gréisste Verbesserungspotential. Eng besser Verriedung vun de Fraen op Entscheedungsposte souwuel an der Politik wéi am Berufsliewen wäert e groussen Impakt an den anere Beräicher hunn a wäert deemno weiderhin ugestrief ginn.

- **Ass eng verstärkt Zesummenaarbecht mat aneren EU-Memberstaate geplangt, fir gutt Praktiken am Beräich vun der Gläichstellung ze deelen**

Déi fir Geschlechtergläichstellung zoustänneg Minister·innen aus der EU stinn a regelmäsegem Austausch, den ech absolut begrëssen an ënnerstëtzen. Mir hu vill gemeinsam Défien an den Austausch vu Best practices kann d'Diskussiounen iwert d'Ausriichtung vun den Egalitéitspolitique vun der Zukunft nëmme beräicheren.

Ech léen och vill Wert op regelmäseg Echangingen op bilatérales Plang fir Allianzen ze schafen oder ze festegen, zumols am Moment wou vill Acquis an de Beräicher Fraerechter an Egalitéit a Fro gestallt ginn. Mir mussen denen destruktive Kräften entgéintwirken an dat geet am beschten zesummen.

De Ministère fir Gläichstellung an Diversitéit (MEGA) ass och op Beamtenniveau an europäeschen an internationale Gremien vertrueden. Sou si Verrieder·inne vum MEGA präsent am High Level Group on Gender Mainstreaming vun der EU-Commissioun, an der Commission pour l'égalité de genre vum Conseil de l'Europe, am Advisory Committee « just gender » vun der EU-Commissioun, als Expert um Niveau vum europäeschen Institut fir d'Gläichstellung tëschent Fraen a Männer (EIGE), an och am „Gender mainstreaming and Governance Group“ vun der OECD.



Och an dëse Gremie fanne vill Echangë statt, et gi Bonnes pratiques vun der Sait vum MEGA gedeelt, an och mir inspiréieren eis hei u gudde Beispiller aus aneren Länner.

Lëtzebuerg, den 13. Januar 2025

D'Ministesch fir Gläichstellung an Diversitéit

(s.) Yuriko Backes